

**A LA ESCELENTÍSIMA SEÑORA ALCALDESA-PRESIDENTA DEL
AYUNTAMIENTO DE XIXÓN**

**PROPOSICIÓN EN DEFENSA Y PROMOCIÓN DE LA MÚSICA Y CULTURA
N'ASTURIANU EN GIJÓN/XIXÓN, ESPECIALMENTE NOS EVENTOS FESTIVOS,
EDUCATIVOS Y CULTURALES**

Doña **Olaya Suárez Fernández**, vocera del **Grupu Municipal Podemos Xixón** nel Ayuntamientu de Xixón, Don **Javier Suárez Llana**, voceru del **Grupu Municipal de Izquierda Unida – Más País – Izquierda Asturiana (IU-MP-IAS)**, y Don **José Ramón Tuero del Prado**, conceyal del **Grupu Municipal Socialista**, al amparu de lo dispuestu nel artículu 76 y siguientes del Reglamentu Orgánicu del Plenu del Ayuntamientu de Xixón, presenten, pal so alderique y votación nel plenu ordinariu que se va celebrar el próximu 1 d'agostu de 2023, la siguiente proposición d'acuerdu:

ESPOSICIÓN DE MOTIVOS

El patrimoniu cultural asturianu inmaterial y material ye un llegáu qu'ha protexese; polo tanto, ha promovese la so conservación, el so conocimientu ente la sociedá y, nos casos nos que seya posible, la so continuación y la so tresmisión xeneracional.

Dientro de tou esti patrimoniu cultural, ún de los pegoyos ye la música asturiana y toles manifestaciones culturales que la pueden arrodian: baille; indumentaria tradicional; lliteratura; artes escéniques, plástiques y audiovisuales... Amás, gran parte d'esta creación cultural, tanto tradicional como contemporánea, espresóse a lo llargo los siglos y sigue espresándose anguaño en llingua asturiana. Esta evidencia nun causó enxamás nengún conflictu na sociedá asturiana; sinón tolo contrariu, porque'l pueblu asturianu siéntese arguyosu de la so identidá cultural y del so patrimoniu.

Amás, la ciudá de Xixón ye bien importante dientro de la historia de la música asturiana. Nesta villa nacieron y/o vivieron artistes tan importantes d'esta escena a lo llargo de los últimos 100 años como Obdulia Álvarez "La Busdonga", José González "El Presi", Alberto Martínez Berciano "Berto Turulla", Carlos Rubiera, Felpeyu, Hevia o Nacho Vegas. Tamién surdieron equí delles agrupaciones folclóriques de toa triba que trabayaron desinteresadamente por conservar y difundir la cultura tradicional asturiana. Toos estos artistes y agrupaciones actuaron y actúen n'asturianu y xubieron a escenarios de los 5 continentes, enseñando al mundu lo que ye Asturias y la nuestra cultura; porque la música n'asturianu tendría de tener el mesmu potencial y respetu que'l flamencu n'Andalucía, el fado en Portugal, el blues n'Estaos Xuníos, les rancheres en Méxicu, o la samba en Brasil.

Nesti sen, consideramos d'importancia que nesti mandatu municipal qu'acaba d'entamar, el plenu del Ayuntamiento de Gijón/Xixón amuese'l so compromisu y la so apuesta decidida en defensa del tol patrimoniu cultural y llingüísticu asturianu y de tola creación cultural que se fai n' Asturias. Facer esto, respetando los derechos culturales, llingüísticos, llaborales y de llibertá d'espresión de tolos axentes que formen parte del sector cultural asturianu; supón un reconocimientu per parte de la ciudá hacia les persones que trabayaron, trabayen y van seguir trabayando pola riqueza de la nuestra cultura autóctona y pol dinamismu social, cultural y económicu que xenera.

ACUERDU

Por eso, nesta moción defendemos que s'apruebe lo siguiente:

PRIMERO.- Garantizar en Xixón el cumplimientu de la llegalidá vixente en materia de derechos llingüísticos, culturales, llaborales y de llibertá d'espresión que recueye la Constitución Española, l'Estatutu d'Autonomía, la Llei de Contratación del Sector Públicu, la Llei d'Usu y Promoción del asturianu, el Plan de Normalización Llingüística de Xixón, y les ordenances y planes vixentes nesti conceyu. Amás de respetar el conteníu presente na Declaración Universal de los Derechos Humanos, na Declaración Universal de los Derechos Llingüísticos y na Carta Europea de les Llingües Minoritaries. Cumplir esta llegalidá significa que, de nenguna manera, una persona nin un collectivu, pue ser discrimináu por espresase en llingua asturiana nin poles sos opiniones.

SEGUNDO.- Non solo caltener, sinón aumentar en Xixón la programación d'actividaes y d'eventos en llingua asturiana, tanto los rellacionaos cola cultura tradicional como les creaciones culturales contemporánees, especialmente a traviés de les conceyalíes qu'abarquen les árees de Cultura, Educación, Deportes y Festexos; amás d'en organismos venceyaos a elles como Divertia o la Fundación Municipal d'Educación, Cultura y Universidá Popular.

TERCERU.- Promocionar y promover adecuadamente esti tipu d'actividaes dientro de la ciudá de Xixón pa que la so incidencia social seya la mayor posible. Porque cuanto más visible y conocíu socialmente seya esti patrimoniu cultural, meyor va protexese, conservase, valorase y tresmitise ente les xeneraciones venideres.

En Xixón, a 24 de xunetu de 2023

53781676V

OLAYA SUAREZ

(R: G56176118)

Firmado digitalmente
por 53781676V OLAYA

SUAREZ (R: G56176118)

Fecha: 2023.07.24

14:02:52 +02'00'

Fdo. Doña Olaya Suárez Fernández
Vocera del Grupu Municipal Podemos Xixón



Fdo. Don Javier Suárez Llana

Voceru del Grupu Municipal de Izquierda Unida – Más País – Izquierda Asturiana (IU-
MP-IAS)



Fdo. Don José Ramón Tuero del Prado
Conceyal del Grupu Municipal Socialista